

La acuile dal Friûl su lis maiis dal Udin graciis ae colaborazion cu la ARLeF

Il simbul al è sul training kit 2026/27 de Udinese Calcio

La identitât furlane e je protagoniste de gnove stagion de Udinese Calcio. In graciis de colaborazion cu la ARLeF – Agenzie regionâl pe lenghe furlane, la maie dal training kit 2026/27, realizade de Macron, e à sul pet la acuile dal Friûl, simbul storic de comunitât furlane. Une sielte che e infuarts il leam fra il club e il teritori propit tal an che l'Udin al fâs fieste pai 130 agns de fondazion.

Cu la acuile sul cûr, la maie di alenament e devente un simbul di apartignince e e valorize storie e identitât furlane, contribuint a promovile ancje fûr dai confins regionai.

«O sin une vore contents pe sielte dal Udin di valorizâ su lis sôs maiis la bandiere dal Friûl», al declare il **president de ARLeF, Eros Cisilino**. «E je une iniziative cuntun significât identitari fuart, che e met adun sport, storie e apartignince e che e contribuîs a mostrâ, ancje fûr de region, un simbul une vore inlidrisât intai tifôs e inte comunitât furlane. E je une sielte che e merete i nestris compliments plui sclets». Une sielte che no à domandât nissun finanziament de bande de Agenzie. La Acuile che e je su la bandiere dal Friûl, ricognossude ancje cuntune leç regionâl, si ispire al vessil doprât dal patriarcje Beltram di Saint Geniès, che al à vuidât il Patriarcjât di Aquilee tra il 1334 e il 1350. La bandiere



La maie dal training kit 2026/27 cu la acuile dal Friûl sul pet.

e je la setime plui antiche in Europe e il so esemplâr originâl al è conservât tal Museu dal Domo di Udin. La colaborazion tra ARLeF e Udinese Calcio e conferme cemût che il sport al pues jessi dal sigûr un veicul straordenari di promozion de culture e de identitât dal Friûl, rivant a puartâ un dai siei simbui plui rappresentatîfs sui cjamps di alenament e intai stadis, denant dal public talian e internazionâl.

Une Fevele Sflandorose

Un libri par capî miôr la storie dal Friûl e la ricjece dal furlan

“Une Fevele Sflandorose. Storie avventurose de lenghe furlane e de sô leterature” al compagne il letôr intun viaç che al traverse secui di storie, mostrant cemût che te lenghe furlane si rifleti chê de Europe stessee.

Des origjins aes trasformazions contemporaniis, i **autôrs William Cisilino e Flavio Santi** a esplorin la difusion dal furlan, la sô vitalitât, la ricjece straordenarie de sô leterature e il leam profund tra lenghe, identitât e teritori.



Dut chest cuntun tai divulgatîf, rigôr scientific e une iconografie sioire di imagjins, documents e testimonanceis visivis.

“E a son lis dôs animis, chê populâr e chê leterarie, che a vegnin esploradis tal ordin cui contribûts di Cisilino e di Santi – al conte te prefazion il scritôr Giorgio Fontana – ancjemò plui prezios parcè che a slargjin a sorprese l’orizzont dal furlan. Cisilino, par esempi, nus pant che l’autôr dal prin test par profotofurlan al è stât un african, e o presein il sincretisim che al à dât forme e vivôr ae marilenghe tai secui – inalterade tant che lenghe regionâl, une raritât intun Nord Italie di comuns. Santi, invece, nus regale un sfolmenât cors intensîf di leterature furlane, de Ete di Mieç a Pierluigi Cappello, fondât su la cubie “lusôr-viamence” che si intone tant ben cun cheste lenghe scrite”.

Dal dut bilengâl (furlan e talian), il libri al è pensât sedi par cui che al cognòs za cheste lenghe, sedi par cui che al vûl svinçâsi pe prime volte ae sô storie linguistiche e leterarie. Par informazions, scrivi a arlef@regione.fvg.it

Il volum – publicât de ARLeF – al sarâ presentât a Pordenonelegge ai 18 di Setembar dal 2026, aes 15.00.